



Kutii Sheria ya Mungu

Kwa maana liko taifa gani kubwa, lililo na Mungu aliye karibu nao, kama Bwana, Mungu wetu, alivyo, kila tumwitapo? Tena liko taifa gani kubwa, lililo na amri na hukumu zenye haki kama torati hii yote, ninayoiweka mbele yenu leo. — **Kumbukumbu laTorati 4:7, 8.**

Kuhusiana na amri Zake Mungu anatangaza, kwa watu Wake kupitia kwa Musa: “Zishikeni basi, mkazitende, maana hii ndiyo hekima yenu na akili zenu, machoni pa mataifa”....

Maagizo ya thamani ambayo Bwana aliwapa watu Wake kutoka Mlima Sinai yalichukuliwa katika kutanga kwao kote jangwani, na yalirudiwa na wao popote pale walipopiga kambi. Mungu alikusudia kwamba watoe kwa mataifa yanayowazunguka picha Yake na ya sheria Yake, kwa maneno watakayosema, na katika njia nyinginezo tofauti. Mara nyingi, walipokutana na watu wasiomjua Mungu, walimwinua Kiongozi wao kuwa ni Mungu mkuu na mtakatifu ambaye wote wanapaswa kumwadhimisha na kumheshimu na kumwabudu daima....

Mataifa yaliyowazunguka yalipaswa kufahamu kanuni tukufu za sheria zilizotolewa na Mungu ambazo viongozi walikuwa wakiwafundisha watu kuzishika. Kisha, badala ya kuwakosoa watu waliofunzwa hivyo, wangeuchukulia ushikaji wa sheria hizi kuwa ni uthibitisho kwamba hawa walikuwa watu waliobarikiwa kwa njia ya pekee miongoni mwa mataifa.

Onesho lingine lisilo kifani kwa mataifa yaliyowazunguka lilikuwa ni utaratibu mkamilifu uliofuatwa katika kambi ya wana wa Israeli. Waliweza kuliona lile wingu likielea juu ya mahali ambapo hema takatifu ingewekwa; waliwaona makuhani na watendaji wengine walioteuliwa rasmi wakiendelea na kazi yao ya pekee, kila mmoja akifanya sehemu aliyopewa katika kazi ya kuandaa kambi kwa ajili ya usiku huo. Hakuna mtu aliyefanya kitu ambacho mtu mwingine alipaswa kukifanya. Yeyote aliyejaribu kufanya kazi ya mtu mwingine angekabiliwa na adhabu ya kifo. Kila mtu alifanya kazi yake maalum. Katika kuisimika hema takatifu, kila kitu kiliwekwa mahali pake, na nyumba ya Bwana ilisimamishwa kwa usahihi mzuri. Hakuna neno lililosemwa, wala agizo lililotolewa, isipokuwa na yule anayesimamia. Hakuna aliyetatizwa; kila kitu kiliwekwa pamoja sawasawa na mfano aliooneshwa Musa mlimani.

Kila kitu kilichohusiana na uwekaji kambi kilikuwa ni somo kielelezo kwa watoto, kikiwafundisha katika mafunzo ya usahihi na uangalifu na utaratibu. Watoto ambao walikuwa wakubwa walitakiwa kujifunza namna ya usimamishaji wa mahema mahali walipoishi, na kuzingatia utaratibu kamili katika yote waliyoyafanya... Daima walikuwa wakiipata elimu kuhusu mambo ya mbinguni. Wazazi walikuwa wakiendelea kila siku kuwaeleza watoto wao kwa nini wana wa Israeli walikuwa wakisafiri nyikani; kwa nini sheria ilitolewa pale Sinai; na kile walichotarajia kufanya, na kuwa watakapofika Nchi ya Ahadi (Manuscript 152, 1901).